



Broj: 01,03,03/11-05-1-1122/15  
Sarajevo, 26.7.2017.

KOLEGIJU PREDSTAVNIČKOG DOMA PSBiH  
KOLEGIJU DOMA NARODA PSBiH  
KOLEGIJU SEKRETARIJATA PSBiH

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLIENO:	31.07.2017		
Organizaciona jedinica	Klasifikaciona oznaka	Redni broj	Broj priloga
01,03,03/11	-05-1-1122/15		

B

**Izveštaj s 43. godišnjeg zasjedanja Parlamentarne skupštine Frankofonije  
Luksemburg, Luksemburg,  
8.-11. juli 2017.**

U Luksemburgu je od 8. do 11. jula 2017. održano 43. godišnje zasjedanje Parlamentarne skupštine Frankofonije (u daljnjem tekstu: PSF) u čijem radu su učestvovali i članovi Delegacije Parlamentarne skupštine BiH u Parlamentarnoj skupštini Frankofonije: Salko Sokolović, Milica Marković i Mensura Beganović.

Tokom ovogodišnjeg redovnog zasjedanja, a prije plenarnog dijela, održani su sastanci Biroa, Mreže žena parlamentarki i komiteta.

Na sastanku Mreže žena parlamentarki, održanom 8. jula 2017., usvojene su odluke sa sastanka Mreže, održanog 10. marta 2017., zatim je usvojen izvještaj o aktivnostima Mreže za period mart - juli 2017. godine. Nakon toga su predstavljeni prijedlozi izvještaja i doprinosi izvještajima koji se izrađuju, i to o temama: žene migrantkinje u frankofonskom prostoru, podići svijest kod muškaraca za sprečavanje i ukidanje nasilja nad ženama, uticaj neupisivanja u matične knjige na prava žena. Zatim su gosti iz Vijeća Evrope predstavili Konvenciju Vijeća Evrope o sprečavanju nasilja nad ženama i porodičnog nasilja (Istanbulsku konvenciju). Na sjednici se još govorilo i o tome kako promovirati učešće žena u sektorima nauke, tehnologije, inženjerstva i matematike, o izazovima i rješenjima potrebnim za dostojan rad žena, o smanjenju rizika od katastrofa kojima su naročito pogođene žene. Na kraju se raspravljalo o budućim izvještajima za koje su određene izvjestiteljice te je formulirano pitanje koje će u ime Mreže žena biti postavljeno generalnoj sekretarki Međunarodne organizacije Frankofonije Michaëlle Jean tokom svečanog otvaranja plenarnog zasjedanja PSF-a.

Na Komitetu za politička pitanja, u čijem radu je učestvovala gđa Marković, raspravljalo se o političkoj situaciji u frankofonskom prostoru, borbi protiv vjerskog radikalizma, zakonodavstvu i dekriminalizaciji kanabisa sa aspekta javnih politika, te o smrtnoj kazni u frankofonskom prostoru. Predstavnici Frankofonskog parlamenta mladih obratili su se članovima Komiteta temom *Kako pomiriti vladavinu prava s borbom protiv terorizma*. Zatim su razmatrani prijedlozi novih tema za izvještaje i određeni su izvjestioci. Usvojena je i revizija Poslovnika PSF-a s posebnim osvrtom na normativni okvir kojim se reguliraju mehanizmi demokratske sigurnosti. Usaglašeno je pitanje koje će se postaviti generalnoj

sekretarki Frankofonije tokom plenarnog zasjedanja i konstituiran je biro Komiteta za period 2017.-2019.

Na Komitetu za saradnju i razvoj u čijem radu su učestvovali gđa Beganović i gosp. Sokolović raspravljalo se o ekonomskoj i digitalnoj Frankofoniji, prijedlogu konvencije između PSF-a i Frankofonskog poslovnog foruma, zatim o radu Francuske agencije za razvoj, građanskom statusu i ekonomskom razvoju s posebnim osvrtom na problem neregistriranja djece u matične knjige rođenih, naročito u Africi. Govorilo se i o Memorandumu između PSF-a i Stalne konferencije konzularnih komora frankofonske Afrike. Zatim su se članovima Komiteta obratili predstavnici Frankofonskog parlamenta mladih koji su govorili o mladim frankofonima i digitalnom preduzetništvu. Razmatrani su prijedlozi rezolucija o uticaju međunarodnih migracija na frankofonski prostor te o praćenju provođenja Ekonomske strategije Frankofonije. Nakon što su čuli izlaganja eksperata, članovi Komiteta raspravljali su i o zajedničkom ekonomskom rastu, o ciljevima trajnog razvoja u frankofonskom prostoru, o zdravstvenim sistemima u području Frankofonije te o međunarodnim trgovinskim pregovorima koji se vode u okviru Međunarodne trgovinske organizacije.

Plenarno zasjedanje svečano je otvoreno u zgradi Luksemburške filharmonije, a članovima Parlamentarne skupštine Frankofonije su se tom prilikom obratili Mars di Bartolomeo, predsjednik Parlamenta Luksemburga, Aubin Minaku, predsjednik Parlamentarne skupštine Frankofonije i predsjednik Nacionalne skupštine Demokratske Republike Kongo, Michaëlle Jean, generalna sekretarka Međunarodne organizacije Frankofonije, Xavier Bettel, premijer Luksemburga i Njegovo kraljevsko visočanstvo Veliki Vojvoda od Luksemburga.

Plenarno zasjedanje je zatim nastavljeno u Evropskom kongresnom centru, a opći moto zasjedanja je jezička raznolikost, kulturna raznolikost, identitet(i). Plenarnom zasjedanju prisustvovalo je oko 500 delegata iz gotovo 80 delegacija.

Ovim zasjedanjem ujedno je obilježena i 50. godišnjica osnivanja PSF-a, koja je osnovana upravo u Luksemburgu 1967. godine pod nazivom Međunarodno udruženje parlamentaraca koji govore francuski jezik. U sklopu obilježavanja 50. godišnjice postojanja PSF-a, čuvena izdavačka kuća Gallimard izdala je monografiju u kojoj je predstavljena historija ove parlamentarne organizacije. Kako bi se na poseban način obilježio ovaj jubilej, u Evropskom kongresnom centru postavljena je i izložba fotografija iz historije parlamentarne frankofonije, a u gradu Luksemburgu je 9. jula otvorena ulica Frankofonije.

Na glavnoj raspravi riječ je uzelo oko dvadesetak učesnika, parlamentarci su razmijenili informacije o jezičkoj i kulturnoj raznolikosti, te, u vezi s tim, o važnosti očuvanja identiteta svakog pojedinca u njihovim državama.

Parlamentarci su usvojili 19 rezolucija koje su se uglavnom odnosile na političku situaciju na pojedinim frankofonskim prostorima, parlamentarnu saradnju, zajednički ekonomski rast i preduzetništvo, građansko obrazovanje i borbu protiv nasilnog ekstremizma i radikalizma.

Delegatima PSF-a su se tokom plenarne rasprave obratili i Martin Chungong, generalni sekretar Interparlamentarne unije, Michel Sidibé, pomoćnik generalnog sekretara Ujedinjenih naroda i izvršni direktor ONUSIDA-e, Steve Gentili, predsjednik Frankofonskog parlamentarnog foruma te Jean-Baptiste Lemoyne, državni sekretar u Ministarstvu za Evropu i vanjske poslove Republike Francuske.

Parlamentarci su raspravljali i usvojili finansijski izvještaj za 2016. godinu i rebalans budžeta za 2017. godinu, te promjene Poslovnika Parlamentarne skupštine Frankofonije, naročito u pogledu mehanizama demokratske sigurnosti.

Predsjednici regionalnih skupština Frankofonije iznijeli su plan aktivnosti u svojim skupštinama te plan narednih zasjedanja. Tako je Jean-Paul Wahl, belgijski senator i predsjednik Parlamentarne skupštine Frankofonije za regiju Evropa, između ostalog, najavio i održavanje plenarnog zasjedanja ove skupštine u Sarajevu, od 23. do 26. oktobra ove godine. Parlamentarna skupština Bosne i Hercegovine, u saradnji sa Sekretarijatom PSF-a za regiju Evropa, već uveliko radi na pripremi ovog zasjedanja, a članovi Delegacije PSBiH u PSF-u razgovarali su s gospodinom Wahlom i šeficom Sekretarijata PSF-a za regiju Evropa o dosadašnjim aktivnostima na pripremi ovog zasjedanja kao i o tome šta još treba uraditi.

Zatim su članovi PSF-a aklamacijom izabrali novog predsjednika Parlamentarne skupštine Frankofonije, na mandat od dvije godine, a to je predsjednik Nacionalne skupštine Kvebeka Jacques Chagnon. Za prvog potpredsjednika izabran je Guillaume Soro, predsjednik Nacionalne skupštine Obale Slonovače.

Na kraju zasjedanja, parlamentarcima su prezentirane rezolucije koje su usvojene na komisijama i na plenarnom zasjedanju Frankofonskog parlamenta mladih čije se 8. izdanje odvijalo istovremeno sa zasjedanjem Parlamentarne skupštine Frankofonije. Održano je i veliko finale u govorništvu mladih frankofona.

Novoizabrani predsjednik Parlamentarne skupštine Frankofonije Jacques Chagnon pozvao je sve učesnike na naredno redovno godišnje zasjedanje Skupštine koje će biti održano u Kvebeku (Kanada) od 5. do 10. jula 2018., nakon čega je zatvoreno 43. redovno zasjedanje u Luksemburgu.

**Izvještaj pripremio:**  
**Adnan Bešić**  
**sekretar Delegacije PSBiH u PSF-u**  
**Sektor za međunarodne odnose i protokol PSBiH**

*Adnan Bešić*

Dostaviti:

- naslovu
- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću
- Sektoru za međunarodne odnose i protokol